

L'identità ladina te vedrina

La Consulta ladina del Comun General à jà tacà a se enjgnèr per la “Aisciuda ladina 2011” che sarà dedichèda a la esprescions de noscia identità soraldut ti setores del comerz e de l'artejanat

Che vevel dir se sentir ladins e co se pevel fèr a ge fèr sentir chesta noscia particolarità ence ai etres? Chest l'é un di argomenc che da trei egn en cà la istituzions e sociazions de Fascia met dant te n event che à inom “Aisciuda ladina”, vardan an dò an de i slarièr fora te duc i setores de la comunanza de val. Coscita al Comun General, la Scola, l'Istitut Cultural e l'Union di Ladins, l'an passà se à jontà ite i joegn hotelieres e i operadores del setor turistic, che i à pissà e studià fora co ge prejentèr e sporjer ence a si ghescé “cerces” de identità ladina, aldò de la conscidrazion chest l'é n valor en più ence a nivel turistic, e che de spes chi che vegn chiò en feries i aprijia e i à gran gust de cognoscer noscia cultura e de sentir nosc lengaz. Al ghest ge sà bel, curious e enteressant veder de esser ruà te n post “spezièl”, desferent dai etres, e na pruma imprescion de chest vers l pel l'aer a veder tabeles e scrites tachèdes fora. Chest an l'Aisciuda ladina, dai 5 ai 7 de mé, se orirà soraldut al comerz e a l'artejanat, per veder coche noscia identità vegn declinèda te chisc setores, coche la vegn “metuda te vedrina”, coche boteighes e berstot se moscia e se ouc a la jent. Ence nos de La Usc proaron te chisc meisc a veder se e cotant che te noscia val la “ladinità” troa lèrga te chisc setores, tel lengaz durà te l'inom, la scrites e la tabeles, o te etres segnes o simboi sui mesi o te la vedrines. Publicaron sun nosc sfoi i retrac de chel che troon fora, e envion jà da ades duc nesc letores a ne segnalèr ence ic che che ge sà enteressant de chest vers. Chest'outa tacon a sentir che che à fat per valorisèr l'identità ladina la maor azienda comerciala de noscia val: l Fassa Coop. Sion jic a l domaner al diretor Luca Giongo e a la responsàbola de la comunicazion e promozion Teresa Lorenz. Tel Fassa Coop – i ne à dit - per valorisèr l'identità ladina, aon scomenzà a se fèr traslatèr la comunicazions, la reclam, e ence documenc, envic e scomenzadives de desvaliva sort, de gra al didament de l'Istitut ladin e de l'Ofize linguistich del Comun General e ades la comunicazion vegn fata ence per ladin. Te la mail manèdes fora, che les rua te n raion maor che demò Fascia, ence a no ladins, vegn durà duc doi i lengac, e ence te la zedoles per i rebasc da prejentèr te boteiga, e aon tacà a fèr per ladin ence i scric per chi che laora te l'azienda, per ge spieghèr coche i à da fèr per i rebasc. E che risposta él stat da man de la jent e di lurieranc? I no ladins se sà ben i vel che la comunicazions les sie ence per talian, ma da l'otra man n'é de chi che é contenc, e no demò fascegn: l'é ence jent da fora che vel ben la spiegazion per talian, ma ge sà bel veder coche sona n lengaz desferent. Chi che laora chiò la pruma outa i se à metù a grignèr, ma dapò i se à usà, e vèlch outa i domana ence che che vel dir na parola o l'otra e zachei se disc content de emparèr vèlch da nef... Coscita mingol a l'outa durèr l ladin doventa na roba normala. Autra scomenzadives é states pissèdes per i destinatères finèi di prodoc. L'é stat studià fora de neva bustines de zucher, con da na man l logo Val di Fassa Dolomites e da l'otra man desvaliva frases scrites per ladin, dapò per ejempie su idea de n refuge l'é stat studià fora de fèr chela bandierines che vegn metudes sul peir te la sgnapa con i 3 colores de la bandiera ladina e l logo Val di Fassa Dolomites. Se un cognessa les fèr demò per sia utia les costassa massa, ma sui gregn numeres se pel les aer a n priesc sche valif a cheles che se troa per solit: l'é na roba aprijèda e che de spes i ghescé se tol dò, fajan coscita ence na piccola promozion. N'otra piccola roba aprijèda da tropes l'é stat chela de fèr scriver “Develpai” sui carnieres del pan e sul papier per fèr ite formai e scialam al banch, na idea chesta che era vegnuda fora apontin te l'Aisciuda ladina l'an passà. Vèlch outa bèsta dassen pech a dèr n picol segn de noscia spezifizità. Speron che te Fascia n sie tropes de chisc ejempies, e ve envion amò a ne i segnalèr.

(lg)